



Komunikadu Imprensa
08 Marsu 2023

**Komemora loron feto Internasionál:
JSMP ejize atu fó importansia ba feto iha lideransa no elimina diskriminasaun
hasoru feto**

Iha 08 Marsu 2023, mundu internasionál inklui Timor-Leste comemora loron internasionál ba feto hodi fó rekoñesimentu ba papél no kontribuisaun feto iha dezvoltamentu nasionál iha setór hotu-hotu iha Timor-Leste.

Timor-Leste nu'udar nasaun demokrátiku ne'ebé respeita no promove valor igualdade no inkluziun, kontinua tau aas direitu feto tanba ne'e kada tinan Timor-Leste celebra loron importante ne'e ba tinan ida ne'e konsagra ho tema "Feto Prontu Lidera."

Feto Timor-Leste maioria dezvoltave-an ona, iha kapasidade no abilidade no envolve sira nia-an iha aspetu oin-oin, lidera ministériu, sai membru parlamentu, lidera departementu no organizaun nasionál no internasionál.

"JSMP rekoñese kontribuisaun feto iha área hotu-hotu nu'udar sentrá tebes, inklui vida polítika, vida ekonomia, asesu justisa iha ita nia governu no ita ninia comunidade sira celebra hamutuk feto sira nia kontribuisaun, sira nia dedikasaun, sira nia luta no lideransa. Maski nune'e, atu promove valor igualdade no inkluzivu ne'ebé loloos tenke rekoñese importánsia papél feto no elimina violénsia hasoru feto no hasa'e sira nia partisipasaun iha prosesu dezvoltamentu nasionál", dehan Sra. Ana Paula Marçal, Diretora Ezekutiva JSMP

Estadu Timor-Leste kontinua promove no asegura direitu feto no labarik feto, introdús inisiativa oin-oin ba promosaun igualdade hodi kombat violénsia no diskriminasaun hasoru feto no labarik feto, kada tinan estadu prevee orsamentu iha kada ministériu atu asegura hakbiit feto iha setór hotu-hotu.

Mezmu nune'e feto barak iha Timor-Leste liu-liu iha área rurais no urbanu balun kontinua infrenta desigualdade no diskriminasaun no violénsia oi-oin iha sira nia moris lor-loron husi sira nia parseiru, família, viziñu no comunidade situasaun sira ne'e kontinua akontese tanba kestaun norma sira sosiais no kultura ne'ebé sei metin iha comunidade nia hanoin. Feto sira kontinua hasoru problema atu asesu ba justisa formál, dala barak feto sira la apresenta keixa hasoru aktu krime ne'ebé sira hasoru

tanba presan husi família, tauk fahe malu (divórsiu ka separa), tauk oan sira abandonadu no problema família sira seluk.

JSMP iha nia atividade sira ba comunidade iha fatin-fatin sempre subliña no fó hanoin ba comunidade sira atu respeita, hadomi, fó oportunidade no trata sira hanesan ita nia-an tanba sira ema hanesan mós ema mane no feto mak hun husi moris.

Aproveita lora importante ida ne'e, JSMP hakarak kongratula feto hotu-hotu iha mundu no partikularmente feto Timor-Leste no kongratula ba mane sira ne'ebé mak hahú muda ona sira nia mentalidade, norma no kultura desigualdade sira hodi respeita, hadomi, fó oportunidade ba feto iha sira idak-idak nia família, comunidade, sociedade no lori mudansa ba feto sira.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl